

Upendo Usio Kifani!

Kwa kuwa hamkupokea tena roho wa utumwa iletayo hofu; bali mlipokea roho ya kufanywa wana, ambayo kwa hiyo twalia, Aba, yaani, Baba. Roho mwenyewe hushuhudia pamoja na roho zetu, ya kuwa sisi tu watoto wa Mungu—Warumi 8:15, 16.

Sheria ya Mungu inapotunzwa daima, na haki Yake kuthibitishwa, mwenye dhambi anaweza kusamehewa. Zawadi ya pekee sana ambayo mbingu ililazimika kutoa imetolewa ili kwamba Mungu “awe mwenye haki, na kumhesabia haki yeye amwaminiye Yesu.” Kwa zawadi hiyo wanadamu wanainuliwa juu kutoka kwenye kuharibiwa na kudhoofishwa na dhambi ili kuwa wana wa Mungu. Paulo anasema, “mlipokea roho ya kufanywa wana, ambayo kwa hiyo twalia, Aba, yaani, Baba”....

Pamoja na Yohana mpendwa ninawasilihi “Tazameni, ni pendo la namna gani alilotupa Baba, kwamba tuitwe wana wa Mungu.” Upendo wa ajabu, upendo usio kifani, kwamba, tukiwa tungali wenye dhambi na wageni, tuweze kurejeshwa kwa Mungu na kuasiliwa katika familia Yake! Tuweze kumwita Yeye kwa jina tulilokirimiwa, “Baba Yetu,” ikiwa ni ishara ya upendo wetu Kwake na ahadi ya wema na uhusiano Wake mwema kwetu. Mwana wa Mungu, akiwatazama warithi wa neema Yake, “haoni haya kuwaita ndugu Zake.” Wanao uhusiano bora zaidi na Mungu kuliko walio nao malaika ambao kamwe hawakuasi.

Upendo wote wa ubaba ambao umeendelea kutoka kizazi hata kizazi kupitia kwenye mkondo wa mioyo ya wanadamu, chemchemi zote za wema ambazo zimefungua roho za wanadamu, ni kama kijito kidogo tu kwa bahari isiyo na ukomo vinapolinganishwa na upendo wa Mungu wa milele, na usiokoma. Ulimi hauwezi kuutamka wala kalamu kuuelezea. Unaweza kuutafakari kila siku maishani mwako; unaweza kujifunza Maandiko kwa bidii ili kuuelewa; unaweza kukusanya kila nguvu na uwezo ambao Mungu ametoa, katika jitihada za kuelewa upendo na rehema za Baba wa mbinguni; na bado usiweze kufikia hitimisho. Unaweza kujifunza upendo huo kwa miaka mingi; lakini bado huwezi kuelewa urefu na upana, kina na kimo, cha upendo wa Mungu katika kumtoa Mwanawé ili kufa kwa ajili ya ulimwengu. Umilele wenyewe hauwezi kamwe kuufunua kiukamilifu. Lakini bado tunaposoma Biblia na kutafakari juu ya maisha ya Yesu na mpango wa ukombozi, mada hizi kuu zitajidhihirisha zaidi na zaidi katika uelewa wetu.

Na itakuwa ni juu yetu kutambua baraka ambayo Paulo alitamani watu wa kanisa la Efeso kuipata alipoomba kwamba, “Mungu wa Bwana wetu Yesu Kristo, Baba wa utukufu, awape ninyi *roho ya hekima na ya ufunuo katika kumjua Yeye*, macho ya mioyo yenu yatiwe nuru, mjue tumaini la mwito wake jinsi lilivyo; na utajiri wa utukufu wa urithi wake katika watakatifu jinsi ulivyo; na ubora wa *ukuu wa uweza wake* ndani yetu tuaminio jinsi ulivyo; kwa kadiri ya utendaji wa nguvu za uweza wake” (Waefeso 1:17–19) (**Testimonies for the Church 5:739, 740**).